

ა ნ გ ა რ ი შ ი

საქართველოს პარლამენტის ევროპასთან ინტეგრაციის კომიტეტის დელეგაციის მონაწილეობის შესახებ სამხრეთ-აღმოსავლეთ ევროპის სტაბილიზაციისა და ასოცირების პროცესში მონაწილე სახელმწიფოთა ევროპასთან ინტეგრაციის საპარლამენტო კომიტეტების კონფერენციაში (COSAP)

17-18 ნოემბერი, 2025
სარაევო, ბოსნია და ჰერცეგოვინა

საქართველოს პარლამენტის ევროპასთან ინტეგრაციის კომიტეტის დელეგაციამ, ეკა სეფაშვილის და ლიკა შარტავას შემადგენლობით, მონაწილეობა მიიღო სამხრეთ-აღმოსავლეთ ევროპის სტაბილიზაციისა და ასოცირების პროცესში მონაწილე სახელმწიფოთა ევროპასთან ინტეგრაციის საპარლამენტო კომიტეტების კონფერენციაში (COSAP), რომელიც 2025 წლის 17-18 ნოემბერს ბოსნია და ჰერცეგოვინაში, სარაევოში, გაიმართა.

COSAP-ის საპარლამენტაშორისო სხდომაში მონაწილეობენ დასავლეთ ბალკანეთის კანდიდატი ქვეყნების - ალბანეთის, სერბეთის, მონტენეგროს, ჩრდილოეთ მაკედონიისა და ბოსნია და ჰერცეგოვინის ევროპასთან ინტეგრაციის კომიტეტების დელეგაციები.

COSAP-ის თავმჯდომარე ქვეყნის მიერ წევრ ქვეყნებთან ერთად, მოწვეული იყვნენ: საქართველოს, უკრაინის, მოლდოვისა და თურქეთის საპარლამენტო დელეგაციები.

ბოსნია და ჰერცეგოვინაში ღონისძიება გაიხსნა გერმანიის და დანიის ელჩის სიტყვით.

სხდომაზე განიხილეს ევროკავშირის გაფართოების პოლიტიკა, გეოპოლიტიკური ვითარება, ეკონომიკური ინტეგრაცია, დაკავშირებადობა და პარლამენტების როლი გაწევრიანების პროცესში. მონაწილეებმა იმსჯელეს სამ ძირითად საკითხზე: ევროკავშირში ინტეგრაციის პროცესის მიღწევებსა და გამოწვევებზე, კანდიდატებს შორის გამოცდილების გაზიარების მნიშვნელობასა და რეგიონულ თანამშრომლობაზე.

ეკა სეფაშვილმა კონფერენციის მონაწილეებს სიტყვით მიმართა და ხაზი გაუსვა საქართველოს წინაშე მდგარ უსაფრთხოების გამოწვევებს, ევროკავშირის გაფართოების პოლიტიკის კონტექსტში საქართველოს გეოპოლიტიკურ მნიშვნელობას, რეგიონში უსაფრთხოებისა და სტაბილურობის შენარჩუნების აუცილებლობას.

აღნიშნა, რომ გაფართოება საერთო ევროპული უსაფრთხოების პროექტია. მიმდინარე ომების, ჰიბრიდული საფრთხეებისა და რთული გეოპოლიტიკური ვითარების გათვალისწინებით, საქართველოსა და დასავლეთ ბალკანეთის ქვეყნებს შორის ინტეგრაცია აუცილებელია უფრო უსაფრთხო და სტაბილური კონტინენტის მშენებლობისთვის.

ისაუბრა კანდიდატი ქვეყნების საერთო ევროინტეგრაციულ ამოცანებსა და საქართველოს ევროკავშირის წევრობის დიდი ხნის მისწრაფებებზე. ხაზი გაუსვა, რომ საქართველო თავისი მიღწევებით მუდმივად იცავს ფუნდამენტურ ევროპულ ღირებულებებს, კვლავ მოწინავეა კანონის უზენაესობის, კორუფციის წინააღმდეგ ბრძოლის ძალისხმევისა და ეფექტური მმართველობის საერთაშორისო შეფასებებში.

ეკა სეფაშვილმა ხაზი გაუსვა საქართველოს სტრატეგიულ წვლილს ევროპის ფართო უსაფრთხოების მშენებლობასა და კვლავ დაადასტურა საქართველოს მნიშვნელოვანი როლი

ენერგეტიკის დივერსიფიკაციაში, შავი ზღვის უსაფრთხოებასა და სატრანსპორტო კავშირის გაძლიერებაში.

საქართველოს პარლამენტის დელეგაციამ გამართა კონსულტაციები, მომდევნო სხდომის მოსამზადებელ სამუშაოებთან დაკავშირებით, ჩრდილოეთ მაკედონიის წარმომადგენლებთან.

COSAP-ის კონფერენცია დასავლეთ ბალკანეთის კანდიდატი ქვეყნებისთვის ევროკავშირში წევრობის საკითხებზე თანამშრომლობის მუდმივმოქმედი საპარლამენტო პლატფორმაა. 2024 წელს, საქართველოს პარლამენტმა, თბილისში, საქართველოსა და დასავლეთ ბალკანეთის კანდიდატი ქვეყნების პირველი საპარლამენტათშორისო კონფერენციის გამართვით საფუძველი ჩაუყარა კანდიდატ ქვეყნებს შორის საპარლამენტო კონსულტაციების გააქტიურებას და შედეგად, 2024 წლიდან დასავლეთ ბალკანეთის კანდიდატი ქვეყნების საპარლამენტო თანამშრომლობის კონფერენციაში საქართველოს საპარლამენტო დელეგაციამ, ორგანიზატორი ქვეყნის მოწვევით, მეოთხედ მიიღო მონაწილეობა.